

Lès Cayetrèsses

1. Dji v' va tchanter 'ne pasquèye qu'est fête so lès Cayetrèsses. Tos lès mwèyins qu'èlle ont, po bin braguer leû tièsse : èlle ont dèss pingnes èt dèss glingons, qui costèt pus d' dî patacons. V's-ont-èle dèss lîves d'ârdjint fèré, mins 'ne savèt-èle ni A ni B !

2. Mins c'est curieûs d' lès veûy âs vèpes èt âs priyîres, alè, vos m' polez creûre, alè si v' volez rîre... Èlle ont leû lîve li cou-z-â hôt : i-n-a, so mi-âme, a rîre si sô. Mins qwand v' loukîz ine fèye leû tièsse vos d'hez so l' côp, c'est dèss Cayetrèsses !

3. Qwant-èle si porminèt, so l' dréve di so l' Avreû, c'est po fé dèss clignètes a tos lès vîs moncheûs. Mins c'est dèss mam'zèles âs clicotes, èle flêrèt come dèl pourèye djote. Èle si d'vrît bin on pô catchî, çou qu'èle pwèrtèt n'est nin payî !

4. Èco n' dîrèût-on rin, si èle ni d'vahît rin, qu'èle polahît 'nn'aler, avâ lès vôyes franqu'mint, sins qu'on n' brêrèût nin après zèles : ''Vinez m' payî don, grande dam'zèle apwèrtez-m' qwinze patârs li meûs, dj'èlzès r'çûrè d'on coûr djoyeûs.''

5. Èle n'ont jamây si sogne, qui qwand sofèle timpèsse,

qui, dèss hôtès mohones, atoum'reût-st-ine ârdwèsse. Ine plate ârdwèsse, ça fêt 'ne plate tièsse : adîè lès pingnes èt lès glingons wice ritrover patârs èt patacons ? Awè l' bèle dame, n'est qu'ine Cayetrèsse.

6. Dj'a-st-intré è s' couhène... Li pavé tot mâssî, dèss-arincrans, ine ône long, qui pindît â plantchî, è fornê, tchantît dèss critchons, n-aveût dèss foûmes plintes di wandions èt s' n'a t-i nin on trô è pwèce qui n' seûye rimpli di neûrès bièsses... !

7. L'ôt' djoû, al fièsse â Pont, dj'invita l' douce Marèye. Èlle aveût dèss mantches a boufe, bin rèboulionêyes. Mi qu'è-st-on tot pô malicieûs, dj'èlzès k'piça inte di mès deûts... Dj' lèva m' tchapê po m'èscuzer, so l' côp dji fouri pardoné.